

Rueras e ses defuncts

GR 28-10-1994

(Fr. B.) Puspei ha la mort privau nus enteifer treis meins da treis convischins ni vischinas. En carezia lein nus seregardar dad els che han bandunau nus. Ei duei esser in act da pietad en regurdintscha cristiana.

Pius Arquisch-Riedi
24-10-1938 - 17-6-1994



Ils 27 da zercladur ha il Segner clamau Pius Arquisch tier El suenter ina roscha onns da pitir e malsogna. Il Pius ha buca mo giu la malsogna che ha mudergiau el. Na, tier tuts mals ha el buca pli saviu plidat, bein ina gronda crusch per el ed ils ses. E tonaton han ins mai entupau el malcuntents.

Naschius ei il Pius a Lumbrein en Val Lumnezia sco siatavel da nov affons. Cheu ha el viviu sia affonza, frequentau la scola e suenter sco biars da nos affons muntagnards, stuiu serender egl jester. A Turitg ha el fatig igl emprendissadi da pot. Forsa ha il schar encrescher, quella ierta grischnuna, schau returnar el anavos en sia patria. Igl onn 1966 eis el vegnius eligius sco pot a Sedrun. El ei s'aclimatissaus dètg pulit en Tujetsch, pertgei igl onn 1972 meina el la giuvna Tresa Riedi da Tschamut sco consorta a casa. Da quella lètg resortan treis stuvents fegls ch'ein veramein stai sia ventira. Igl onn 1976 surpren il Pius la filiala dil VOLG a Rueras. Cheu ha el luvraru, sedau breigia per fatschenta e clientella e quei cun anim ed engaschi. El fuva beinvesius tier jasters e dumiastis.

Ed els megliers onns ha el stuiu far enconuschiantscha cun ina dolorusa via dalla crusch. En tut ses onns da malsogna ha el giu la ventira dalla carezia e la tgira da sia consorta e da ses treis fegls. Quei vegn a ver levgiau ad el sia sort. Sia admirabla pazienzia e resignaziun sa esser per nus tuts in exemplar.

Naschius in di d'atun, ha el suandau il clom dil Segner in di da primavera. Possien las flurs divinas haver legrau el el paradis. Nus tuts ch'el ha entupau e surviu lein dir in sincer «Dieus paghi». A ses cars nossa profunda condolien-tscha. Bien vischin, rauassa en pasch!

Luzia Venzin 27-3-1912 - 26-8-1994

Ils 26 d'uost ha la mort liberau Luzia Venzin da ses davos paupers onns da suffriantscha da vegliadetgna.

L'onda Zia, sco ella vegneva numnada enta Rueras, ei naschida ils 27 da mars 1912, sco siatavl da 12 affons dalla famiglia da Vigeli e Barla Venzin-Giger. La mumma ha la famiglia piars che la Zia haveva strusch otg onns. Restai anavos cun il bab ein otg affons. Il frar vegl haveva 16 onns. Aschia han els veramein giu ina affonza munchentanda dalla carezia materna. Dumandavan ins la Zia ni in da ses fargliuns co qui seigi iu aschia quels onns, udevan ins bugen: «enzacu o i stuiu i». Ils medems onns menava quella famiglia la filiala

dil consum liber a Rueras ed il bab Vigeli fageva il pur. Aschia han tuts affons empriu baul da luvrar e segidar. Dasperas ha era la Zia stuiu schigiar il paun jester. Denton lez ei staus per ella ina crusch ed in buordi. Nua ch'ella mava, ella schava encrescher cun ina brama per casa e famiglia, ina caussa nonsupportabla per ella. Aschia ha ei



sedau ch'ella ei turnada e s'engaschada en casa e sil funs ed era segidada tier il consum liber. Igl emprem ensemen cun siu bab e dapi la mort da lez igl onn 1951 sur sesezza. La stizun sesanflava en l'atgna casa e pér igl onn 1964 ha la societat dil consum erigiu in agen baughet per quella fatschenta. Igl onn 1976, suenter bunamein 50 onns en stizun, ha ella desistiu da sia plazza e vegnida pli retratga.

La veta dall'onda Zia ei stada in frequent survir als auters. Ella temeva nuota da pigliar en la lavur era la pli greva ni mendra. Denton fuva ella era buca maufra da palesar siu mein e quei saveva lu capitlar savens. Buca bugen ch'ella restava culponta als clients ni vischins ina risposta. Beinenqualina da sias tècas e rispostas han fatg la curella tras la val. Mo ella era ina survetscheivla als ses ed a ses vischins. Da giuvna fuss ella vegnida bugen scolasta, mo la veta ha duui esser altra. Cunquei che siu bab

fageva igl organist en la «farria» da s. Vigeli, haveva ella era entschiet a sedar giu cun il harmonium en stiva. Cul temps ha ella empriu da sez da sunar sin quel e vonzei eis ella schizun s'avanza-sco organista gidontra en la caplania da s. Giachen a Rueras. Per aschidadir organista da luverdis ni vischandra dalla orgla. Cun igl exemplar dall'onda Zia san ins constatar co ils talents dalla giuventetgna ein savens vegni satrai avon onns. Aschia vesein nus che nossa defuncta ha en tutta cass dominau la veta en lavur e cumentientscha.

Cura ch'ella ei ida igl onn 1976 en pensiun, havessen ins pudiu cuir ch'ella possi guder ina vegliadetgna en andanta sanadad e ruaua. Denton cun seschar ordlunder dalla lavur e societat ni muort las fleivlezias da vegliadetgna, vonzei han ins encurschiu che schar star ella persula e solitaria en sia atgna casa fuss stau in ughetg nunsupportabel. Aschia ha l'onda Zia stuiu dar cumiau alla casa ch'era stada dimora naven dall'affonza entochen il temps da vegliadetgna. E la vegliadetgna ei vegnida cun sias anomalitads e miserias. La Zia da pli baul cun sia vitalitat e spontanadad era buca pli d'enconuscher. Ni parents ni enconuscents enconuscheva ella pli e serisdar e seraschunar cun ella ei stau onns ora quasi nunpusseivel. Grev per tgi che ha giu da far cun ella ina veta ora. Forsa aunc bia pli grev per ella cun siu temperament dil qual ins saveva mo pli sere-gardar ni s'imaginar.

La sera dils 26 d'uost ha ella pudiu bandunau nus e siu suffrir ha priu ina fin. A tuts quels che han fatg dil bien en sia veta lein nus engraziar. Cara onda Zia, rauassa era Ti en pasch!

Sofia Berther-Berther
10-12-1919 - 21-9-1994



Cura che nus scrivin quellas lingias en memoria da nos defuncts vegn ei endamen, ch'enteifer il decouors d'in onn han duas famiglias da nies vitget giu da metter omisdus geniturs en santeri. Nos-

sa vischina Sofia Berther ha rendiu ils 21 da settember sia olma al scaffider e suandada siu mariu Victor suenter paucas jamnas.

La Sofia ei naschida a Dieri ils 10 da decembre 1919. Ella era feglia da Baseli e Mariuschla Berther-Gieriet e la tschunavla dad endisch affons survivors e da treis barets. En ina famiglia aschi gronda dev'ei nuot auter che gia sco affon segidar cun geniturs e fargliuns. Ils da Dieri havevan tier tut igl auter aunc savens in prigulus viadi igl unviern per ir a scola ni en baselgia ni era sch'els vulevan setener ensemes cun ils da Rueras.

Sias scolas ha la defuncta frequentau a Rueras. Suenter ils onns da scola ha ei era tuccau alla giuvna da serender egl jester. Stada returnada a casa ha siu bab tarmess ella a Glion en la scola da puras. Suenter quels onns da scolaziun ha la Sofia surviu ad Aarau tier famiglias pli elevadas da signurs directurs e miedis. Buca ch'ins vess encurschiu suenter ch'ella fuss sesentida pli bia che auters. Sia demanonza aviarta e sempla ha ella salvau vinavon.

Derivonta d'ina famiglia purila vess ins cartiu che la giuvna matta fuss sedecidida per in pur. Denton igl onn 1945 ha ella fundau famiglia cun il giuven fravi Victor Berther da Rueras. Denton era cheu ha la Sofia anflau lavour da pura sco avon en casa paterna. Els han onns ora giu tiers manedels ed aschia luvrau ils funs artai da casa. Daferton ch'il Victor regeva e luvrava en fatschenta ha la Sofia fatg aschia la pura. La numerosa figlialonza ha pretendiu lavour ed engaschi. Mo la culminaziun da lur veta ei stada il quita e plascher per lur affons. Per quels ha ton la Sofia sco il Victor unfriu lur veta en carezia. Ina veta emplenida cun beneficenzas ed unfrendas per ils ses.

E lu ei la vegliadetgna vegnida cun mals e malsognas dil mariu ed in da ses fegls ch'ei morts memia giuvens. Onns ora ei la Sofia stada il grond agid da siu mariu en quitaus da di e da notg! Strusch stai serendi en casa da vegls a Sedrun per haver empaui pli lev, ei il Victor morts ils 26 da matg e gia ils 21 da settember ei la Sofia era suandada el. Per nus tuti ei quei stau nuncapeivel. Ad ella che ha surviu e tgirau siu mariu entochen la mort, havessen ins cuiu da tut cor ina biala sera della veta, in saver ruassar e guder. Mo las forzas eran consumadas e la Sofia spossada. E tier la davosa viseta ha ella sezza detg: «Ju puss betga plé». D'ina dimora el spital eis ella buca pli returnada.

A tut tgi che ha gidau ed accumpnau els ils onns da malsogna vegli il Segner dar la pagaglia. Alla Sofia giavischein nus la glisch celestiala ensemes cun siu consort.

In schar encrescher per nos defuncts taluna en nus cura che nus seregridein dallas sentupadas cun els e dil toc viadi ch'ins ha fatg ensemes. Sche scadin da Vus che havevis entupau els fageis in patratg da carezia per ils defuncts, eis ei la valeta da scriver sur da nos morts.